

INUIT ATAQATIGIIT

Inatsisartuni



UPA 2019/183
9. maj 2019
Stine Egede

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni aamma Islandimi Naalakkersuisut nunat akornanni sammisami timersornermut tunngasumi suleqatigiinnerup annertusarneqarsinnaaneraniq mississuequllugit kaammattorpai.

(Aallartitat siulittaasuat Vivian Motzfeldt)

Nunat Avannarliit Killiit Siunnersuisoqatigiiffiata siulittaasuata Vivian Motzfeldt-ip siunnersuutaanut qujarusuppugut.

Siunnersuullu taperserlugu imaattumik Inuit Ataqatigiinniit oqaaseqarfigissavarput.

Ukiuni kingulliunerusuni nunatsinni timersornermik sammisaqarneq ajoraluartumik annikilliarporpoq. Tamannalu assigiinngitsorpassuarnik peqquteqartoq nalunngilarput.

Angajoqqaat ilaat nukissaqanngillat imaluunniit piffissaqarneq ajorput meeqqat mikineriniit ataavartumik timersoriartissallugit. Ilaatigut meeqqat arlariit kisermaajullutik paakkutarisussaagamikki.

Allat aningaasaqarnikkut erloqinartumik atugaqarnertik peqqutigalugu akissaqarneq ajorput timersuutiniq meeqqaminnut pisinissaminnut, allaalluunniimmi timersoqatigiiffinnut qaammammut akiliutissannguatik iluatigisarpaat.

Meeqqat ilaasa kajungerinerusarpaat sunngiffittik allatut atussallugu.

Ajoraluartumillu meeqqat amerlasoorujussuit ullutsinni spil-it, kiisalu qarasaasiat sammissallugit nuannarinerulersimavaat. Ilaatigut eqqarsarnartorujussuuvoq meeqqat amerlavallaat aalavallaarunnaarnikuuneri, tamannami kingusinnerusukkuq peqqinnissaq eqqarsaatigalugu ajoqutigisinnaammassuk.

Tassani angajoqqaatut aamma annertuumik akisussaaffeqarpugut.

Ukiuni kingullerni assammik arsarnermi, isikkamik arsarnermilu nunatsinni pissartannorniuttarnerni ajoraluartumik klubbet ilaat siornatigut takussaalluuartarsimasut maqaasinarsisimapput.

Klubbet aaliangersimasut peqataajuaannarput, tamanna qujanarpoq ingerlalluortoqarmat, taamaattorli sineriammiut, pingaartumik “isorliunerusukkormiut” qimataajartorput.

Timersoqatigiiffiit kattuffiat suliniuteqartuarpoq, tamanna qujanarpoq amerlasuummi tamanna iluaqutigisarpaat.

Timersornerup nuannersuunerata, minnerunngitsumik peqqinnartuunerata inerisartuarnissaa annertunerusumik piorsarnissaanut aqutissanik nassaarniartuarnissaq Inuit Ataqtigiinni kajumissuseqarfigaarput.

Nunat Avannarliit Killiit, tassalu Island-ermiut Savalimmiormiut, Nunattalu timersornikkut unammiaarsinnaalernissaannik periarfissarsiorneqarnissaat siunertaralugu Naalakkersuisut nunani pineqartuni misissuinissaannik kaammatorneqarnerat uggornartumik nunatta Naalakkersuisuisa tapersinngikkaat maluginiarparput.

Timersornikkut suliniaqtigiiffiit ukiorpassuarni, pingaartumik Island suleqatigisarsimavaat. Aammattaaq klubbet ataasiakkaat timersortartuminnik, pingaartumik Island-imut aallartitsisarput. Tamakkulu inuit, imaluunniit klubbet ataasiakkaat namminneq piumassusaat aallaavigalugu ingerlanneqartarpoq.

Naalakkersuinit aallaavilimmik, nunat pingasut akimorlugit, misissuisoqaralarpat, nunanut pingasunut qaqugorsuarmut ineriartortitassamik pilersitsisoqarsinnaassagaluartoq Inuit Ataqtigiinni uppeqaarput. Tamannalu aamma qularnanngitsumik meeqqanut timersornerulernissamik pilersitsisinnalissagaluarmat.

Timersortartuutitta ilaat, qaffasissumik timersorusuttut nunarput qimallugu aallartariaqartarput. Ilaalu nunatsinnut uteqqinngitsoortarput.

Siunissaq ungasinnerusiq isigalugu timersornikkut meerartavut, inuusuttavullu piorsaavigissagutsigit periarfissatsiavissuvoq nunat avannarlermioqativut peqatigalugit ineriartortitsinnaagutta. Island-imiut assammik arsartartui VM-inut peqataasalernikuupput, tassuuna nunap angivallaanngikkaluartup qanoq timersornikkut aallulluarneqarnera takuneqarsinnaavoq. Savalimmiormiuttaaq isikkamik arsartartui qaffasissumut inissisimalernikuupput.

Nunatsinni ukiuni kingullerni illup iluani arsarneq futsal ingerlalluarneqalersimavoq. Isiginnaartartullu nalunngilaat qanoq inuusuttut arsallaqjissut amerlatigisut. Ilaatigut tamakkuusinnaagaluarput annertuumik sammineqarsinnaasut, nunanut allanut unammisaqattaarnermik ineriartornissaannik aqutissiuullugit. Qanittukkut tusarparput nunatsinneersoq qallunaat nunanut allanut arsartartunut ilanngutsinneqartoq. Tamanna tanngassimaarnarlunnaqqissaarpoq.

Nunat sanilivut peqatigalugit unammijuaarnerit assigiinngitsut ingerlanneqartarsinnaagaluarpata amerlasuutigut iluaqutissarsiffiusassagaluarpoq.

Taamaattumik siunnersuut taperserlugu ataatiititaliamut susassaqtumut sukumiisumik suliarineqarnissaa innersuussutigalugu ingerlateqqipparput.

Qujanaq.